



Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03 i 42/03) i člana 1. stav 1. Zakona o carinskoj politici Bosne i Hercegovine ("Službeni glasnik BiH", broj 57/04), Vijeće ministara Bosne i Hercegovine na 72. sjednici održanoj 16. decembra 2004. godine, donijelo je

ODLUKU

O PROVEDBENIM PROPISIMA ZAKONA O CARINSKOJ POLITICI BOSNE I HERCEGOVINE

NASLOV II OBAVEZUJUĆA INFORMACIJA

GLAVA I Definicije

Član 8.

U smislu ovog naslova:

1. *obavezujuća informacija* znači informacija o tarifnom razvrstavanju robe ili informacija o porijeklu robe propisana članom 11. Zakona.
2. *podnosilac zahtjeva*:
 - u pitanjima koja se odnose na tarifu znači osoba koja je podnijela zahtjev carinskim organima za izdavanje obavezujuće informacije o tarifnom razvrstavanju;
 - u pitanjima koja se odnose na porijeklo robe znači osoba koja je podnijela zahtjev carinskim organima za izdavanje obavezujuće informacije o porijeklu robe.
3. *imalac* znači osoba u čije ime se izdaje obavezujuća informacija.

GLAVA 2

Postupak za dobivanje obavezujuće informacije - Dostavljanje informacije podnosiocima zahtjeva

Član 9.

1. Zahtjevi za izdavanje obavezujuće informacije podnose se Upravi za indirektno oporezivanje (u daljem tekstu: Uprava) u pisanom obliku na obrascu iz priloga 1. ove odluke.
2. Zahtjev za izdavanje obavezujuće informacije o tarifnom razvrstavanju odnosi se samo na jednu vrstu robe. Zahtjev za izdavanje obavezujuće informacije o porijeklu robe odnosi se samo na jednu vrstu robe i jedan splet okolnosti pod kojim se utvrđuje porijeklo.
3. (A) Zahtjevi za izdavanje obavezujuće informacije o tarifnom razvrstavanju moraju sadržavati sljedeće podatke:
 - (a) ime i adresu držaoca robe;
 - (b) ime i adresu podnosioca zahtjeva kada ta osoba nije držaoc robe;
 - (c) detaljan opis robe koji omogućava njenu identifikaciju i određivanje njenog razvrstavanja u carinskoj nomenklaturi;
 - (d) sastav robe i sve metode pregleda korištene za njegovo utvrđivanje a kada razvrstavanje zavisi od toga;
 - (e) svi uzorci, fotografije, planovi, katalozi ili druga raspoloživa dokumenta koja mogu pomoći carinskim organima u određivanju tačnog razvrstavanja robe u carinskoj nomenklaturi trebaju se priložiti kao prilozi;
 - (f) predviđeno razvrstavanje;
 - (g) saglasnost o dostavljanju prijevoda svih priloženih dokumenata na jednom od službenih jezika BiH, ako to zatraže carinski organi;
 - (h) sve podatke koji se trebaju tretirati kao povjerljivi;
 - (i) naznaku podnosioca zahtjeva da li je, prema njegovom saznanju, obavezujuća informacija o tarifnom razvrstavanju za identičnu ili sličnu robu već bila primjenjivana ili izdavana u BiH;
 - (j) prihvatanje da se dostavljeni podaci mogu pohraniti u bazu podataka carinskih organa; međutim, bez obzira na član 14. Zakona, primjenjuju se važeći propisi u BiH kojima se regulira zaštita podataka.
- (B) Zahtjevi za izdavanje obavezujuće informacije o porijeklu robe sadržava sljedeće podatke:
 - a) ime i adresu držaoca robe;
 - b) ime i adresu podnosioca zahtjeva kada ta osoba nije držaoc robe;
 - c) zakonski osnov koji se može primijeniti u smislu čl. 19. i 24. Zakona;
 - d) detaljni opis robe i njeno tarifno razvrstavanje;
 - e) sastav robe i sve metode pregleda koji su korišteni za njegovo utvrđivanje te, po potrebi, ex-works cijenu robe;

- g) sve uzorke, fotografije, planove, kataloge ili druga raspoloživa dokumenta o sastavu robe i materijalima od kojih je sačinjena, koji mogu pomoći u opisivanju proizvodnog procesa ili obrade kroz koju su ti materijali prošli;
 - h) saglasnost o dostavljanju prijevoda svih priloženih dokumenata na jednom od službenih jezika BiH, ako to zatraže carinski organi;
 - i) sve podatke koji se trebaju tretirati kao povjerljivi, bilo u vezi s javnošću ili upravom;
 - j) naznaku podnosioca zahtjeva da li je, prema njegovom saznanju, obavezujuća informacija o porijeklu za robu ili materijale koji su identični onim iz tač. (d) i (f) ovog stava već primjenjivana ili izdavana u BiH;
 - k) prihvatanje da se dostavljeni podaci mogu pohraniti u bazu podataka carinskih organa, koja je dostupna javnosti, međutim, bez obzira na član 14. Zakona, primjenjuju se važeći propisi u BiH, kojima se regulira zaštita podataka.
4. Kada po primitku zahtjeva carinski organi smatraju da one ne sadrži sve podatke potrebne za davanje obavezujuće informacije, carinski organi zahtijevaju od podnosioca zahtjeva da dostavi potrebne podatke. Rokovi od tri mjeseca i 150 dana iz člana 10. ove odluke počinju teći od trenutka kada carinski organi imaju sve podatke potrebne za donošenje odluke; carinski organi obavještavaju podnosioca zahtjeva da su primili zahtjev te o datumu od kojeg počinje teći navedeni rok.

Član 10.

1. Obavezujuća informacija dostavlja se podnosiocu zahtjeva što je prije moguće na obrazcu iz priloga 2.
 - (a) U pitanjima koja se odnose na tarifu: ako obavezujuću informaciju nije bilo moguće dostaviti podnosiocu zahtjeva u roku od tri mjeseca nakon prihvatanja zahtjeva, carinski organi stupaju u kontakt s podnosiocem zahtjeva kako bi objasnili razlog kašnjenja i naveli kada očekuju da će biti u mogućnosti dostaviti informaciju.
 - (b) U pitanjima koja se odnose na porijeklo robe: informacija se dostavlja u roku od 150 dana od dana prihvatanja zahtjeva.
2. U obaviještenju se navodi koji će se podaci tretirati kao povjerljivi. Navodi se i pravo žalbe iz člana 236. Zakona.

GLAVA 3

Pravna snaga obavezujuće informacije

Član 11.

1. Bez odstupanja od članova 5. i 61. Zakona, na obavezujuću informaciju može se pozivati samo držaoc robe.
2.
 - (a) U pitanjima koja se odnose na tarifu: carinski organi od držaoca robe mogu zahtijevati da, prilikom vršenja radnji i postupaka, obavijesti carinske organe da je u posjedu obavezujuće informacije koja se odnosi na robu koja se carini.
 - (b) U pitanjima koja se odnose na porijeklo robe: carinski organi nadležni za provjeru primjenjivosti obavezujuće informacije o porijeklu robe mogu od držaoca robe zahtijevati da, prilikom okončavanja radnji i postupaka, obavijesti te organe da je u posjedu obavezujuće informacije o porijeklu robe kojom se obuhvaća roba u vezi s kojom se radnje i postupci okončavaju.
3. Imalac obavezujuće informacije može je koristiti u pogledu konkretne robe samo kada nadležni carinski organ utvrdi:

- (a) u pitanjima koja se odnose na tarifu: da određena roba u svakom pogledu odgovara onoj koja je opisana u predloženoj informaciji;
- (b) u pitanjima koja se odnose na porijeklo robe: da određena roba i okolnosti koje određuju njeno porijeklo u svakom pogledu odgovaraju onim koje su opisane u predloženoj informaciji.

Član 12.

1. Nakon usvajanja jednog akta ili mjere iz člana 11. stav 5. Zakona, carinski organi poduzimaju neophodne korake kako bi osigurali da se obavezujuća informacija od tada izdaje samo u skladu s tim aktom ili mjerom.
2. U pogledu obavezujuće informacije o tarifnom razvrstavanju, a u smislu stava 1. ovog člana, datum koji se uzima u obzir je datum utvrđen članom 11. stav 5. tačka (a) Zakona.
3. U vezi s obavezujućom informacijom o porijeklu robe, a u smislu stava 1. ovog člana datum koji se uzima u obzir je datum utvrđen članom 11. stav 5. tačka (b) Zakona

GLAVA 4

Odredbe koje se primjenjuju u slučaju isteka obavezujuće informacije

Član 13.

1. Kada imalac obavezujuće informacije, koja je prestala važiti iz razloga navedenih u članu 11. stav 5. Zakona, želi da iskoristi mogućnost pozivanja na takvu informaciju tokom određenog perioda u skladu sa stavom 6. tog člana, on o tome obavještava carinske organe i dostavlja sva neophodna prateća dokumenta kako bi omogućio vršenje provjere u smislu ispunjavanja svih relevantnih uvjeta.
2. U izuzetnim slučajevima kada nisu ispunjeni uvjeti iz stava 1. ovog člana, koji se odnose na mogućnost nastavka pozivanja na obavezujuću informaciju o tarifnom razvrstavanju ili obavezujuću informaciju o porijeklu robe, carinski organi o tome pismeno obavještavaju imaoa.